

La reclama per tubac ha uffants e giuvenils en mira

Gievgia ha il comité grischun che sustegna l'iniziativa per la protecziun dals uffants e giuvenils da la reclama da tubac preschentà ses arguments. Ils 13 da favrer votescha il pievel svizzer davart quella iniziativa.

MARTIN GABRIEL/FMR

Il comité grischun che fa reclama per in GEA a l'Iniziativa Uffants senza tubac vegn sustegnì fermamain da la Lia grischuna cunter il cancer e da la Lia pulmonara grischuna. Las tschintg dunnas ed umens da la politica e da la medischina a la testa dal comité han preschentà gievgia a Cuir lur puncts da vista e lur motivaziun da s'engaschar per l'iniziativa. Quella vegn refusada dal Cussegl federal e dal parlament cun ina cuntraproposta. Tenor ils iniziants duai la reclama per tubac, la promoziun da la vendita e tut il sponsoring d'interpresas da tubac che cuntanschan uffants vegnir scumandads. E quest scumond vegniss francà en la Constituziun federala. 9500 Svizras e Svizzers moran mintg'onn da malsognas en consequenza dal consum da tubac.

Ils blers cumenzan en la pubertad

En in votum fitg engaschà avant las medias ha la cussegliera naziunala *Sandra Locher Benguerel* ditg ch'ella saja dischillusa ch'il parlament federal haja approvà ina cuntraproposta che na saja nagut auter ch'in exercizi dad alibi: «Tenor

la cuntraproposta èsi precis en ils lieus cun in grond public d'uffants e giuvenils lubì er vivand da far reclama per tubac. Per exempel en gasettas gratuitas, en kioscs, en l'internet e sin areals da festivals.» 60 pertschient dals fimaders cumenzian a fimar durant la pubertad, damai cun var 13 onns. Uschia saja cler tge public che l'industria da tubac haja en mira.

«Jau stun uschè mal d'avair cumenzà»

«En ils onns 1970 vegniva fimà perfin sin las staziuns da tgira dals ospitals», ha quintà l'anteriura tgirunza e deputada *Martha Widmer-Spreiter* da Cuir che fa era part dal comité. Uschia haja era ella cumenzà a fimar durant l'emprendissadi en il spital. Propi libra dal fimar na saja ella mai pli vegnida. «Jau stun oz uschè mal d'avair cumenzà cun quest vizi», ha la politicra ditg en in raschioni cun la FMR. «Jau hai chalà varga 10 onns da fimar e lura puspè cumenzà. Jau hai anc chalà bleras giadas e mintga giada cur che jau hai in pau squitsch, cumenz jau puspè.» En il comité s'engascha



Il comité grischun vul scumandar la reclama da tubac che cuntanscha il conturn d'uffants e giuvenils.

FOTO LIVIA MAUERHOFER

«Gea per uffants senza tubac»

Il comité grischun «Gea a la protecziun dals uffants e giuvenils cunter la reclama da tubac» s'engascha è per in scumond da la reclama per tubac. Tuttas activitads da promoziun e da sponsoradi che cuntanschan uffants e giuvenils duain vegnir scumandadas. Il comité grischun ha in patrunadi che consista da las suandantas tschintg persunas:

Urs Hardegger, deputà l'Allianza dal Center

Géraldine Danuser, presidenta da la Partida verd-liberala GR, Cuir

Sandra Locher Benguerel, cussegliera naziunala dal PS, Cuir

Martha Widmer-Spreiter, deputada da l'Allianza dal Center, Cuir

Roger von Moos, schefmedi oncologia e hematologia al Ospital chantunal dal Grischun, Cuir

Martha Widmer-Spreiter era per dar vivand ses messadi als giuvenils ed als uffants dad oz.

Mintg'onn 130 cas da cancer

En il chantun Grischun survegnan mintg'onn var 130 pazientas e pazients la diagnosa cancer dal lom. Dapli che la mesadad da quels cas sajan en in stadi avanzà e betg pli curabels. Il

schefmedi da la partiziun oncologia e hematologia da l'Ospital chantunal a Cuir, *Roger von Moos*, ha rapportà da destins fitg dolorus e tragics. «Jau hai vesì situaziuns che pazientas e pazients e confamigliars eran al cunfin da quai che l'uman po supportar.» Latiers vegnan ils custs: «Be ils medicaments per tractar il cancer dals pulmuns custan 100 000 francs per onn per pazient.»